

fi auant dans l'ame de ce pauvre captif si fouuent échapé de la mort, que dés lors il prit feu, se refolut d'estre Chrestien, & du depuis quelque resistâce qu'il ait trouué, quelques difficultez qui se foient presentées, iamais il ne s'est démenty de ses faintes resolutions.

Vn autre quasi de mesme aage qui luy tint compagnie au Baptesme, prit le nom de René. Ce ieune homme ne fut pas plustost retourné de la chasse qu'il vint trouuer le Pere. Efface moy ie te prie mes pechez, luy dit-il, nous sommes dans de continuels dangers de nos vies, où irois-ie n'estant pas baptisé? ie crains plus l'enfer que la mort, ie fuis tout resolu de seruir Dieu; & quoy qu'il arriue iamais ie ne l'offenferay: il voit la sincerité de mon cœur, & ie croy qu'il est content de moy, ne me fois pas plus rigoureux [128] que luy. En effet ses actions n'ont point démenty ses paroles, & toûiours il s'est comporté en Chrestien mesme auant que de l'estre.